

**Qasigiannuguit Aasiaallu akornanni erngup nukinganik nukissiorfiliorsinnaanissaq anguniarlugu aalajangiinissamut tunngavigisassamik Naalackersuisut UKA19 nallertinnagu saqqummiusseqqullugit peqquneqarnissaannik Inatsisartut aalajangiiffigisassaattut siunnersuut. Aalajangiinissamut tunngavissaliornermi ilanngullugu erngup nukinganik nukissiorfiliassap qanittuaniittut illoqarfiit nunaqarfiillu sorliit ilanngunneqarsinnaanissaat naliliiffigineqarsimassaaq taavalu nukissiutitut ataavartunut assigiinngitsunut Igaliko-mi misilittaannermi paasisat atorneqarsinnaanersut ilanngullugit nassuiaasiunneqassallutik.**

(Inatsisartunut ilaasortaq Aqqa Samuelsen, Inuit Ataqtigiit)

### **Akissuteqaat**

(Inuussutissarsiornermut, Nukissiuuteqarnermut Iisimatusarnermullu Naalackersuisoq)

### **Aappassaaneerinnineq**

Naalackersuisut sinnerlugit Sanaartornermut Ataatsimiititaliaq qutsavigissavara suliasamik peqqissaartumik suliaqarsimanerannik.

Siunnersuutip siullermeerneqarneranut atatillugu annertuumik soqutigineqarpoq Naalackersuisut Nukissiuuteqarnermut Imermillu Pilersuinermut immikkoortumut Pilersaarutaat.

Immikkoortumut pilersaarut imaqarpoq anguniakkanik aalajangersimasunik 35-inik, Naalackersuisut 2030-ip tungaanut atortuulersikkiartuaarniagaannik. Anguniakkat aalajangersimasut taakkua ilagaat Aasiannut aamma Qasigiannuganut erngup nukinganik iluaquteqarluni nukissiorfiliornissamut tunngatillugu aalajangiinissamut tunngavissat.

Immikkoortumut pilersaarummi anguniakkanik atortuulersitsiartuaarnerup ilaatut aallartinneqareerput misissuinerit, erngup nukinganik iluaquteqarluni nukissiorfiliorsinnaasunik, Aasiaat aamma Qasigiannuguit pilersorneqarnerannut.

Naalackersuisut ataatsimiititaliap isumaliutissiissutaanut naapertuuttumik saqqummiussaqaassapput Aasiaat aamma Qasigiannuguit erngup nukinga iluaqutigalugu pilersorneqalernissaannut atatillugu aalajangiinissamut tunngavissamik.

Taamatut oqaaseqarluta Naalackersuisut siunnersuut Inatsisartunut suliasanngortippaat.